

四庫全書

集部

欽定四庫全書

集部

蛟菴集卷一至三

詳校官編修_臣翟棟

中書_臣劉源溥覆勘

總校官進士_臣朱鈴

校對官中書_臣袁文邵

謄錄監生_臣劉國永

欽定四庫全書

集部五

蛻菴集

別集類四 元

提要

臣等謹案蛻菴集五卷元張翥撰翥字仲舉
晉寧人至元初用隱逸薦召為國子助教分
教上都尋退居淮東會修宋遼金三史起翰
林國史院編修官累遷翰林學士承旨致仕
加河南行省平章政事給俸終身事蹟具元

史本傳案金明昌承安間亦有張翥字曰仲陽劉祁歸潛志記其矮窻小戶寒不到一爐香火四圍書西風了却黃花事不管安仁兩鬢秋諸句稱其浮艷諸書援引或誤為一人非也翥嘗從學於李存傳陸九淵之說詩法則受於仇遠得其音律之與其詩清圓穩貼格調頗高近體長短句極為當時所推然其古體亦伉爽可誦詞多諷諭往往得元白張

王之遺亦非苟作王士禎居易錄曰蛻菴元末大家古今詩皆有法度無論子昂伯庸輩即范德機揭曼碩未知伯仲何如其論當矣史稱翥遺稿不傳傳者有律詩樂府僅三卷王士禎則稱蛻菴集四卷明洪武三年錫山郎成抄本此本乃朱彞尊所藏明初釋大杼手抄本前後有來復宗泐二人序跋蓋大杼與翥為方外交元末翥沒無嗣大杼取其遺

稿歸江南別為選次而錄存之考元音乾坤
清氣集玉山雅集諸書所錄翦詩尚有出此
集之外者則亦非全本也乾隆四十六年十
月恭校上

總纂官臣紀昀臣陸錫熊臣孫士毅

總校官臣陸費墀

蛻菴集原序

嗚呼詩豈易言也哉大雅希聲宮徵相應與三光五嶽之氣並行天地間一歌一咏陶冶性靈而感召休徵其有關於治教功亦大矣然自刪後至於兩漢正音猶完建安以來寢尚綺麗而詩道微矣魏晉作者雖優不能兼備諸體其鏗鏘軒昂上追風雅所謂集大成者惟唐而後有之降是無足采焉逮及於元靜脩劉公復倡古作一變浮靡之習子昂趙公起而和之格律高深視唐

無媿至若德機范公之清淳仲弘楊公之雅贍伯生虞公之雄逸晏石揭公之森嚴更唱迭和於延祐天厯間足以鼓舞學者而風厲天下其亦盛矣哉河東仲舉張公生於數君子之後以詩自任五十餘年造語命意一字未嘗苟作至正丙午春其方外友廬陵北山杼禪師以公手藁選次而刊行之來徵言為序余猶記公之言曰王者迹熄而詩亡詩未嘗亡也而所以為詩者亡矣善賦之士往往主乎性情工巧非足尚蓋性情所發出

於自然不假雕繪觀公之詩知公之所
雲舒歛無跡此其冲淡也崑崙雪霽河
涵也灝氣橫秋華峰玉立此其清峭也
驟馳此其俊邁也風日和煦百卉競妍
情賦景兼得其妙讀之使人興起誠為
余謗材何足以鋪張盛美然託契於公
北山之高誼不得辭始僭叙之以冠篇
釋蒲菴來復序

蜨菴集原序

欽定四庫全書

阮菴集卷一

元 張翥 撰

五言古詩

堂堂

朝為堂堂吟暮為堂堂謳堂堂徒爾竒堂堂徒爾憂不
見膏與蘭煎燔祇自休勿以不遇故棄捐經與史勿以
勢利故棄捐廉與恥勿以行役故棄捐山與水謂夜未
遽央已復明星明仰視何煌煌白露忽沾裳懷人攬余

心何以勿永傷江北亦為客江南亦為客為客多偏兀
何以安所適上有君與親下有妻與息在山則種榆在
隰則種蒲馬牛必維婁舟航必繻柶富貴富貴友貧賤
貧賤徒歲月來者多江湖逝者遠所得不可逝所期不
可返幸此世累輕歸去衡門偃

雜詩

先人有夙訓聞在幼壯時豈意衰暮日乃復新驗之茫
茫上天理詎可私臆知百年大化中流浪從推移信彼

杞憂者徒為衆所嗤

叔子鄰家兒探環記前身次律求師後一悟了宿因我
亦清源洞蛻骨巖下人誤墮聲利區驅馳喪其真所以
付樽酒都忘賤與貧惜無還丹術高舉遺世塵悠悠笙
鶴期曠望三山津

寒日迫縣車寸陰老愈惜晨趨理公務暮返親墳藉究
往發孤憤思來抱深惕理愜復相忘神劬聊一息湛然
擁襟坐栩栩鼻端白千齡與化終不朽在方策聖哲有

明訓學道庶自益

寒夜何晶晶中庭積繁霜天風下河漢萬里流玉光羽
衣四三人各乘白鳳凰笙響發空際游雲高馳翔無緣
執霞佩攬結雙明璫願托月中桂終古有餘芳

隴坂何崎嶇行人且復止直上望晴川遙遙憶鄉里流
離肝腸斷悲歌不能已一身已遐征永念同室子何殊
轉蓬科隨風四散起雖得同根生不得同根死吾洒古
今淚多於隴頭水

春江采瑤草將以伸繾綣初期拾翠洲復道滋蘭畹美人隔花深歌竟瑤瑟僵臨流不可見恍忽心未穩佳時難驟得鷓鴣鳴已晚祇有千古思綿綿楚波遠黎丘之丈人歸路逢奇鬼既為鬼所惑又復鬼其子夏南滑蜀梁俯影明月裏背走謂伏鬼而又鬼諸已此皆非鬼者特以疑故死憧憧奸佞徒情狀實鬼爾匿迹不自慚胡為滿朝市

河淮厭兵禍城邑多荒榛百里無幾家但見風起塵燕

雀歸果樹豺虎饑食人鄉來脂膏地死骨今如銀流亡
使復業牛種當及春安得百龔名錯落為拊循征討尚
未息奈何爾遺民

前出軍五首

前軍紅衲袍朱絲繫彭排後軍細鎧甲白羽攢
車左右馳萬馬擁長街送行動城郭斗酒飲同儕壯士
當報國母為故鄉懷

鍛鐵作佩刀磨石為箭鏃中軍把轅門前豎十丈纛朝

上蘆溝橋夕次洵河曲超乘既誇勇騁馬復齊足男兒
不封侯百年同視肉

昨日發萬軍今日發萬軍明日發萬軍
鳥騎來羣羣馬蹄所經過黃埃蕩成雲
堆糧與作飯倒樹與作薪道途行者絕
那得有居人

大軍北庭來部伍各有屯放馬原隰枯磨刀河水渾行
行且射獵雉兔不復存野次羣馳卧弓箭挂車轅幽幽
笛聲起日暮傷人魂

京師少年子膽氣乃麤豪傾金售寶劍厚價買名刀白
氍作行帳紅綾製戰袍結束往從軍談笑取功勞當時
霍嫖姚豈在學戎韜

後出軍五首

步卒傖楚健長刀短甲衣大叫前搏敵跳蕩如鳥飛左
提血髑髏右奪賊馬歸黃金得重賞顧盼生光輝爾輩
疾歸命將軍足天威

我軍城東門呼聲震屋瓦百萬山壓來此賊何足打狂

鋒尚力拒轉鬪血噴洒城中有暗溝多陷人與馬將令
毋輕入明當一鼓下

先鋒才攻門後軍已登陴拔都不怕死直上奪賊旗馬
前獻逆首脚下踏死屍長河走敗船疾遣飛將追幕中
作露板應有傳脩期

行行鐵兜鍪隊隊金駱駝嗚嗚吹銅角來來齊唱歌總
戎面如虎指顧揮琯戈馬蹏無賊壘手筭可填河王師
本無敵安用戰圖多

魔賊生汝亳獠賊起於海嬰鋒天狗觸墮網奔鯨駭徐
方一戰收振旅已奏凱江浙塵既清豫章圍亦解諸將
如竭力削平行可待

獨酌謠

有酒且一醉有歌且一謠杯盡當再酌歌闕須重調生
足意自適身榮心苦焦所以黎首人放浪樂漁樵一謠
仍一酌且復永今朝明朝未可料况乃百歲遙但願花
長開美酒長滿瓢靜疑太古調散覺神理超近識南郭

叟得酒時見招盡醉即高卧誰能慕松喬

古鏡

古鏡色如墨照人不見形我照乃見心洞徹天地明此明非外來此明非內有自是世上人惟將照妍醜

題林大用隱居飯牛山

山田多白石陽陂足豐草瘦地費牛力飯之當宿飽近午牛背熱出耕須及早解紉休樹陰念此穀觫老隱居抱正學逍遙事幽討商歌干齊侯戚也豈知道

中秋望月

當年見明月不飲亦清歡
詎意有今夕照此長恨端
近聞錢塘破流血城市丹
官軍雖殺賊斯民已多殘
不知親與故零落幾家完
徘徊庭中影對酒起長歎
死生兩莫測欲往書問難
仰視雲中雁安得托羽翰
淒其衰謝踪有淚徒汎瀾
山中松筠地棄置誰與看
河漢變夜色西風生早寒
累觴不能醉百念摧肺肝

送客齊化門東馬上口號

白楊多悲風黃葉滿行路荒溝寒水碧亂石且無數我
興遠送別駐望生百慮欲往豈不懷畏此簡書故遙遙
墟烟上歷歷鳴雁度秋景倏已短歸人驅車去勞歌一
淒然回首重愁暮

陽曲義士薛氏旌表詩卷

至正二年事十二年
其里人趙時照求題

上天久無雨南風日吹沙旱氣彌蟲蟲六月稻不花晉
土素磽瘠如此歲食賒上官方勸分義士起嘆嗟發帑
捐積鏹糴粟來連車吾鄉忍溝壑哺爾萬口呀厚澤田

里被頌聲父老誇預備世勿務征斂惟紛拏遂令活人
功乃出一士家不知時有司視此無愧耶我作義薛詩
好德良可嘉願言講荒政生意當無涯

安童都事字鼎新號太虛徵余賦之集賢院

太虛本無象何有倪與端至理妙自然萬化孰控搏天
地亦一物而在虛空間所以豪傑士不受世網干脫迹
形氣表出入凌汗漫驚鵠為我導雲飈作之翰仰扳霄
衢轡俯濯龍池瀾綠文粲瑤軌高咏瀛洲山冥心合玄

想坐以空洞觀琳腴薦朝食紫金咀神丹無待無窮外
浩然與之還

郝農歎

郝南有農者家僅一兩車王師征淮蔡官遣給軍儲翁
無應門兒一身老當夫勞勞千里役泥雨半道途到軍
遭焚烹翁脫走故閭車牛力既盡戶籍名不除府帖星
火下爾乘仍往輸破產不重置笞箠無完膚翁復徒手
歸涕洟滿敝襦問家牆屋在榆柳餘殘株野雉雠梁間

狐狸穴階隅老妻出傭食四顧筐篋無有司更著役我
實骨髓枯仰天哭欲死醉吏方歌呼

題述律萬戶澹樂軒

惟澹有至樂此樂世罕知誰能味無味舍彼甘與肥君
侯文武才面有虎豹姿被甲起上馬出入百萬師西來
樹功勲獻頌白玉墀方將大將權繞帳羅旌麾紛華艷
人目孰不為朶頤顧於方寸間物累乃若遺齋居寄遐
賞而無山林期處樂寧易言豈獨靜者宜始知豪傑士

自有絕世資悠哉澹中趣吾道同所歸

送黃中玉之慶元市舶

昔我遊四明壯觀溟海波褰裳寶山頂曙色寒嵯峨日
輪鎔生金涌出萬丈渦雲氣忽破碎朱光相盪摩決皆
蓬萊宮攜手扶桑柯羣仙迎我笑佩羽紛傤傤颶風歛
驚潮騰擲鯉與鼉浮槎徑可擘從此超天河精神動百
靈上下煩撓訶歸來已十載遠夢時一過君家賢父兄
儒術傳世科薄言捧省檄舶署聊婆娑是邦控島夷走

集聚商舸珠香雜犀象稅入何其多權衡較低昂心計
寧有訛資閱須歷試壯圖詎蹉跎惟君官事隙為訪巖
之阿懸想仙者徒往往笑且歌遐征渺不見空響遙相
和因聲兩黃鵠持我紫玉珂豈無滄洲興奈此塵劫何
門有車馬客行

坐秋雨思秋風仰眎白日雲中彼美一人誰容秉心鬱
其忡忡

為客一鼓云何慷慨起舞悲歌巨魚出聽涼波鳴鳥排

徊庭柯

有客有客在門崔嵬高蓋華軒起欲與之語言已叱僕
夫回轅

寧不少忍須臾謂我巷不容車北望豪家是趨堂上有
箏有竽

盛衰相尋無端媒勞恩絕則然還坐自樂我間勿謂無
知絕絃

七言古詩

古促促辭

促促何促促丈夫生兒美如玉長城游蕩不思歸令我
隻身守空屋不願汝學班定遠不願汝學馬相如定遠
生不入玉關相如死不還成都但如塞翁父子長相保
得馬失馬何足道又如龐公攜家隱鹿門遺安遺危俱
不論貴而衣貂不如貧而縕臬離而食肉不如聚而飲
水身雖促促心得寬為汝白頭屋中死

北風行

長河風急波浪惡青天晝黃塵漠漠瓠瓠渡中舟盡泊
官船捲帆與水爭牽馬毛寒過不行禿樹挂戛枯蓬驚
夜深風定浪聲死憲光倒搖天在水前伴相呼隨雁起
帽絮不暖衣生稜老賢不語愁河冰上閘下閘應盛凌
篙師指直失增減明星欲明霜似糝館陶城南鼓統統

螢苑曲

楊花吹春一千里獸艦如雲錦帆起咸洛山河真帝都
君王自愛揚州死軍裒小隊皆美人畫龍鵜汗金麒麟

香風搖蕩夜游處二十四橋珠翠塵騎行不用燒紅燭
萬點飛螢炫川谷金釵歌度苑中來寶帳香迷樓上宿
醉魂貪作花月荒肯信劍戟生宮牆爛斑六合洗秋露
尚疑怨血凝晶光至今落日行人路鬼火孤鳴隔烟樹
腐草無情亦有情年年為照雷塘墓

城西路

城西路多少人從此中去昨日紅顏美少年今朝白骨
委黃泉縱令藏金比山積鬼伯不受人間錢少年何用

誇豪富來看城西送人處

發古城鋪

黃蒿古城風捲沙澗頭衰樹啼寒鴉
歲云暮矣霜露積夜如何其星漢斜
滿衣落月行人起馬上夢魂猶在家

王貞婦

青楓嶺頭石色赤嶺下嶂江千丈黑
數行血字尚爛斑雨蕩霜磨消不得
當時一死真勇烈身入波濤魂入石
至今苔蘚不敢生上與日月爭光晶
千秋萬古化為碧

海風吹斷山雲腥可憐薄命良家女千金之軀棄如土
姦臣誤國合萬死天獨何為妾遭虜古來喪亂何代無
誰肯將身事他主兵塵瀕洞迷天台骨肉散盡隨飛埃
楓林景黑寒燐墮精靈日暮空歸來堂堂大節有如此
正當廟食依崔嵬君看嶧江之畔石上血與湘江之竹
淚痕俱不滅

題昌化陳孝子傳

百丈山前妾逢主禮賢鎮中子逢母三十餘年昨日同

白髮相看淚如雨阿嬈去時未斷乳兒壯得知心獨苦
清湖老嫗天所留逆旅主人神使語歸來桑竹溪之許
婦前持觴兒起舞雙瓜生祥表秋圃豈用旌書勳官府
吳人買妾紛莫數歲滿母歸遺子女巷南巷北不相覓
况復山川兩脩阻嗚呼千秋復萬古孝子之名在寰宇
世上滔滔忘母人不愧唐昌一杯土

題鐵石驄馬圖

神厓黑龍時出水游北何年得其子是何毛骨如積鐵

迥立長風獨竒偉
霜蹄白鼻散五花
條見馬中真駟
美髯奚官能剪拂
不遣雲鬢浣泥滓
少施鞵勒即飛騰
唾尚不敢況敢撫
馬生豈在粟一石
不飽寧能見才美
朝燕晡越信汝良
安得壯士同生死
阿師一室中錫外
時展此圖臨燕几
三生似是支道林
愛馬苦心同若此
平原豐草秋漠漠
恍惚寒沙颺然起
英雄有志在青雲
老眼因之空萬里

題趙文敏公畫馬

君不見漢家將軍求善馬戰骨縱橫血流野歸來作歌
薦宗廟寧悲鬼哭宛城下何如聖代德所懷入獻磊落
皆龍媒右牽者誰鬘者偲萬里知自宛沙來眼光鏡懸
蹄腕促老奚識性仍善牧時巡之外游幸稀飽秣原頭
春苜蓿吳興學士藝絕倫妙處直似曹將軍只今有馬
無此筆誰與寫之傳世人為君甘老駕駘羣

題牧牛圖

去年苦旱蹄馱塊今年水多深沒鼻爾牛轂竦耕得田

水旱無情力皆廢畫中見此東臯春牧兒超搖犢子馴
手持鵠鵠坐牛背風柳烟蕪愁殺人兒長犢壯須盡力
豈惜辛勤供稼穡縱然喘死死即休不願徵求到筋骨

題李白觀泉圖

玻璃杯中春酒綠醉墨淋漓牡丹曲平生合置七寶牀
白紵烏紗美如玉阿瞞荒宴百不理寧記宮花銜野鹿
何物老嫗生此兒偷向金雞帳中宿高將軍纔奴隸耳
誤使脫鞵吾所辱要留汙襪踏鯨魚鼠子何堪煩一蹴

尋常溝瀆不可濯何處容伸遭汙足翩然却下匡廬雲
五老峰前看飛瀑

題郝內翰書所作夢觀瓊花賦後

釣魚山前龍上天武昌城外走蜀船老奸欺國馳露布
使者坐囚吞雪氊潰兵一夜甲填水血污木棉花下鬼
豈知老仙方卧游鶴背天風扶夢起顏雲挾月光西流
玉簫聲斷江聲愁露華泣盡瓊樹死廣陵春色寒於秋
百年遺賦人爭重勁墨道毫精爽動節旄零落喜生還

回首江南已如夢花神換根春更芳想像月色扁餘香
楚招無人青鳥去公不少留涕泗滂

題趙仲穆怪石竒木

君不見岳陽城南老樹能化人又不見草中巨石如卧
虎樹逢仙客授還丹石誤將軍箭飛雨海寧太守提健
筆與丹通靈箭角力山精木魅寒睽睽千年醜怪匿不
得銜瘤半裂雷大出隱入雲綃露竒跡猝然一見心膽
驚氣盡畫工俱辟易挂之高堂風動搖古色一片秋蕭

蕭侍候硯池卷東海歸寫扶桑與沃焦

題長孫皇后諫獵圖

黃門曉出西清仗秋色滿天鷹犬王虎落遙連渭水南
鸞旗直度河橋上日邊雲氣五色文虬鬚天子真天人
羽林猛士森成列六氣不驚清路塵太平無征帝神武
豈為禽荒將按部已知哲后佐興王不數樊姬能霸楚
從容數語即罷田六宮迎笑花如烟蹕回那待外庭疏
聽諫由來同轉圜天寶神孫隳大業錦繡五家爭蹀躞

可憐風雪驪山宮正與真妃同射獵

題華山圖

華岳連天向西起，湏洞秦川三百里。
巨靈高掌削芙蓉，影落黃河一線水。
雲臺霧谷巢神仙，羽衣金節時周旋。
大笑失脚白羸背，歸來石上長鼯眠。
千載悠悠寄元賞，耳孫風骨猶蕭爽。
遠從丹丘渡滄海，追挹神踪欲長往。
何人想像圖真形，疊嶂陰洞高林青。
上摩金天之帝京，下攬玉女之明星。
峰耶魔耶兩莫極，虎豹叫絕烟霏冥。

仙家樓觀超然住遙認微茫是征路丹梯鐵鎖不可攀
直喚茅龍上天去

懶拙道人茗溪曉望圖

憶昔薄遊茗之城溪光近秋山晚晴連峰接嶂望不極
惟有白雲縱復橫漁村無林樹墨色微風忽起菰蒲聲
月從太湖東畔出直射西塞山前明人家碧玉壺中住
野舫銀河天上行酒酣時起發長嘯水底直遣魚龍驚
老暉鄉亦此盤礴安知今我非三生盡搜萬象入奇筆

畫與詩境俱崢嶸吾家茗中有茅屋京塵滿鬢難為情
頃令扁舟夜入夢萬頃鷗波歸濯纓

金宣孝太子墨竹

沙海神光射天起中有蟠龍龍有子混同江聲何處來
卷作琳琅墨池水蜿蜒颺起鱗鬣張蛻骨立化千篋
一朝侍臣抱髯泣鶴駕不歸雲路長百年梁苑陵谷變
流落人間能幾見明昌內府應秘藏小字親題保成殿
吁嗟帝子真天人此君亦作天人真君不見洋州老太

守揮灑雖工無此神

綠玉連環歌為邢從周典簿作

于闐河頭夜光發赤髯賈胡采明月中有美璞凝寒晶
誰許鬼工能琢成伊誰得此邢公子示我綠玉雙連理
恍如空碧虹氣垂半隱青瑤蟾一規展之兩環不逾尺
疊作團團小蒼壁縠文錯落映雷文宛是昆吾寶刀刻
廬陵學士癖好奇辨古重似瓊琚詞珊瑚佩鈎詎可數
我疑制自金源時集賢仙公丈人行鳳閣舍人文有樣

請君留東宮錦袍待看揮毫玉堂上

并州歌送張彥洪使畢還河東

吾鄉故人零落盡見子老成殊慰心祥金百鍊乃利器
桐尾方焦逢賞音河東臬府幕下士飛傳來作朝正使
太和嶺上盜已空旌旗盡是官軍紅殺人如麻道路絕
朝狐暮梟競巢穴嚴風歛起霜倒飛塞日黯淡寒無輝
子來未幾遽言歸使我東望淚沾衣豈不聞并州少年
游俠子手攜玉龍最輕死并州將軍劉越石夜半登臨

長嘯起汾河直來繞郡城雁門離石寒崢嶸老旻四葉
彈丸地大梁全師勞再征一朝征賊輒破碎大將不誅
天失刑為子作歌歌憤激眼中太行如動色安得壯士
射烏弓為落撓搶連太白

劉道權為李遠子微作青山似洛中圖為作歌
以係之

石頭城中有渺渺之秦淮秦淮東流入江遠其上疊巘
連魯厓牛頭雙闕雲門開三山北山鬱烟霾六朝遺跡

猶在眼千古往事徒興懷昔人謂此洛中似四面青山
圍二水劉侯熟識此景勝况復愛畫入骨髓五尺長紙
繭不如乘興破墨塗成圖漁梁茅屋昏欲無壞陵荒隴
迷楸梧寒潮已落斷崖濶行人不渡扁舟孤嵩邪邱邪
漫漶那可辨但見招提林杪直下藏村墟憶我羈遊石
城日江烟山雨正蕭瑟橫塘酒家好新酒醉倚船窓看
奇崛只將健句寫歸來却恨此時無此筆

吳儁仲傑橫河精舍圖亦道權作

橫河精舍誰所居豐城隱者吳仲傑是中林壑特幽勝
一幅劉權畫尤絕遠山數曲重復重炊烟一村樹叢叢
嵐光雲氣紛滉養盱水汝水遙相通近山什伯青匝
峰底斜穿鷓鴣峽跳波直下却洄漩怪石截斷雙流合
竹窓桂棟溪之隅過門好客無時無溪魚長肥酒長熟
撥棄世務談詩書梧州春雨草木長櫟塘耕稼仍膏壤
鉏翁牧子行唯諾沙鳥風帆自來往獨不見陶縣令松
菊園又不見杜陵老桑麻田人生得此不歸去有如頭

上之青天傑乎傑乎吾羨汝母負山中故人招隱篇

崔旭行之雲巢圖贈道士俞剛中請余賦長歌

崔郎胸次竒突兀興來從人索紙筆斯須千峰萬峰出
底用一石畫五日上饒道人列仙癯示我新作雲巢圖
塗嵐抹霧思更逸古色滿眼蒼寒俱重溪疊谷各異狀
壞木崩石森相向翠微最上雲所棲道人又在雲之上
數椽丹室蔭白茅團團雲間如一巢拂衣拂著宿鶴背
挂劍挂落長松梢空濛杳靄迷處所豈復漂搖畏風雨

既非鳥窠老衲子無乃中林古巢父
填窓擁戶晝不開
神光隱見金銀臺雲之君今鳳為馬
往往玉簫吹月來
道人幾年游上國賣藥壺中人不識
洞玄宮觀

剛中所建宮名

一黍珠靈秀似與仙都敵
故巢未破歸便得
歸到玉山
多美石我詩母刻刻此圖
留照千秋山水碧

剛中永豐縣人

送崔讓士良都事江淮行省

時平久不脩武備
一旦盜賊起
跳踉南關荆鄧北
徐汝
紅巾直來據武昌
摧城破壁官吏走
九江太守能死守

赤眉銅馬終殄除此賊游魂邠得久天兵勢若風雨來
直掃四野無氛埃廟謨最先擇元帥國計莫重完江淮
堂堂中書開外省幕府人材倚公等崔侯如刃新發硎
鋒銳所當無肯綮金湯表裏元有捷正藉前籌資薄伐
草茅有策可采用義士多方須教閱酒酣客起征馬鳴
壯氣滿髯肝膽傾浩歌把劍徒激烈老矣莫賦從軍行
為古紹先題劉平妻胡氏殺虎圖

沙河岼邊秋草白棗陽城頭落日黑老兵辛苦踐更來

林下稅車聊一息黃蘆颯颯中夜鳴
偃鬼呌嘯悲風生
虎饑得人怒不置婦急徒手危相爭
直前死力持虎足
呼兒進刀屠虎腹但知有夫豈知虎
視之何殊机上肉
當時一擊寧顧軀驚魂碎骨仍攜扶
九原瞑目已無憾
舊血勿湔身上襦
千秋節義傳鄉閭
我猶膽怯見畫圖
健婦果勝一丈夫
向來馮婦有不如

城南

城南北風朝卷沙將軍開宴樹大牙
黃鬚健兒飽酒肉

十五五來將車盡驅丁男作生口鬼妾鬼馬充其家
嗚呼上天不可問道旁觀者徒咨嗟

范寬山水

憶昔往尋剡中山南明天姥相縈盤客路上頭穿鳥道
行人脚底踏風湍旦寒露重多成雨洩霧濛雲互吞吐
僕夫相呼巖谷間空響磨人作人語溪窮岼斷地忽平
石門壁立如削成隔水無數山花明中有人家雞犬聲
向來老眼曾到處此境俱作桃源行百年留在范寬筆

水墨精神且蕭瑟上有翰林學士之院章恐是宣和舊
時物林猿野鶴應自在令我相見猶前日時平會乞閒
身歸一壑得專吾事畢

張師夔為郭子靜作終南山色因題

終南山色秀可食中有游雲動凝碧華嶽西面仙掌高
仙都下射金精白紺宮琳館憑險阻渭水晴川來咫尺
古木深藏魍魎寒陰厓曉入蜿蜒黑幽人舊隱依青壁
蘿徑紫籬閉寥闕野橋挿岸何處船落日無人獨歸客

櫟翁筆法追郭熙遠意欲寄烟霞微半生江海屢驚夢
萬里風塵能化衣捷徑無媒既愁寂故山好在曷遑歸
尚說於今明月夜時有簫聲臺上飛

天香室為四明定水復見心禪師賦

寺有楊誠齋題

定水山中多古桂老璘結茅來避世囊中少試蒸花法
正藉烟霏作輿衛誰令作詩傳世人一時攪動聲聞塵
百年公案結未了復翁拈起還清新唱開石壁壁成字
百顆明珠照天地不關旃檀林下風薰破枯禪半邊鼻

吾聞佛家別有衆香國我亦三生學禪客若為一洗六
根空從子歸來分半席

題趙文敏公木石有先師題於上

吳興筆法妙天下人藏片楮無遺者南陽詩律動江湖
一篇才出人爭寫二老風流傾一時只今傳畫仍傳詩
清涵月露秋見影黑入雷雨寒無姿仇山黃鶴去不返
茗溪鷗波歲俱晚好呼鐵爪夜錚錚刻向青珉照人眼

題武林姚氏頤壽堂

有地須種木蘭花有樹好宿雙啼鴉木蘭女兒能代父
慈鴉之雛能哺母姚家堂中如畫圖鶴髮高居彩衣舞
當年兵塵暗鄉關扶攜藁砧烟瘴間天留晚福在平世
去家萬里仍生還有兒有婦供滄漣書聲歌聲動隣里
板輿不待魚軒列鼎不如負米中有至樂物莫比酌彼
金壘酒起為頤顏壽堂前日日春風和棘心之詩豈
足多我今獨無空爾羨如此堂中護草何

題雪溪待渡圖

晉陽山下蒲村渡斷坂連岡疊烟樹橫汾水落流更急
客子西歸迫秋暮朔風轉雨作雪飛倚蓋沙頭泥沒屨
後來者誰須我友望望津船出前渚濕雲撲地邊鴻驚
危橋挂岸征馬生樵家有逕凍葉平土牀火煖無人聲
亂峯倒倚白石爛空壑半壓冰槎橫歸來想像猶眼底
詎擬褐夫能畫此溪明雪淨古色起一片荒寒在窓几
歲晚遠游吾倦矣

題李早女真三馬扇頭

金源六葉全盛年明昌正似宣和前寶書玉軸充內府
時以李早當龍眠想當畫院供奉日飽閱天閑萬奇骨
等閒游墨落宮扇駿氣凌風欲超忽霧鬣風髮剪剔新
郎君丰格玉為人四帶紗巾綉衣領醉鞭踏盡燕臺春
一聲白雁黃河暮豈料征蹄竟南渡回首西風障戰塵
女仙空抱琵琶去

題陳所翁九龍戲珠圖

兩龍頡頏出重淵白日移海空中懸一龍回矯一倒起

側磔胡髯怒歎水火珠炎炎如彈丸爪底雲頭爭控搏
一龍仰首逆鱗露兩龍旁睨蒼崖蟠怪風狂電浩呼洶
天吳倅立八山動一龍後出尤崛竒半尾戲繞蜿蜒兒
兒生未角已神猛一顧却走千蛟螭陳翁硯池藏霹靂
往往醉時翻水滴便覺天瓢入手來雨氣模糊渾是墨
我嘗見畫多巨幅簸蕩驚濤駭人目何如此筆窮變化
三尺微綃形勢足是翁前身定龍精故能吸歛奔精靈
卷圖還君慎封鐫但恐破壁飛空冥

題侍郎秋江捕魚圖

秋江水多魚唯唯海風驅潮葭茨靡輕舸競載罾網出
欲向中流截魴鯉巨鱗有神不可獲騰踏波濤脫泥滓
最憐濡沫苓箬間小白針頭尖如指釣璜渭叟晚終遇
西塞玄真微不起若人自是隱者徒豈比沙島漁蠻子
高髯能畫得玄理塗抹山川游戲耳千巖萬壑堆白雲
稍看人家喬木底眼中之景何所似富春澤畔鷗鷺里
兩臺蕭瑟秋風高脚底灘聲蕩清泚我當扁舟衝雁過

彷彿厓根舊曾艤自知世外漁者村只合投竿老烟水
巨緇未辦五十牯草屨撈蝦從此始

畫馬

後有宋思陵
押封以御寶

睿思殿中萬幾暇縹帶犀籤閱名畫君王愛此神駿姿
筆勢不在韋韓下五雲御押手自封玉窠蟠屈宸篆紅
百年重遭赤馬刳散落不逐兵塵空誰歟傳之能愛惜
尺楮蕭蕭開古色驪駒玉面蹄腕白青絲絡腦黃金勒
風鬣半散頭怒側一團渥洼雲氣黑緋衫圍郎緊控持

直恐驕騰收不得向來南渡小朝廷虎視欲與金源爭
蜀襄馬場能幾匹尚想按圖心膽傾只今萬里龍沙道
游牝千羣飽豐草天閑上駟皆乘黃駑蹇紛紛世空老

贈吳士桑饒

吳興一士氣貌醇儒冠落魄甘長貧醫家諸書總貫穿
有病有藥即與人山中僦屋不肯出苦厭城市多囂塵
得錢沽酒飲即醉指點富貴如浮雲時來西湖住幾日
所宿隨夜食隨晨過門與我談抵掌百無一偽皆天真

疾惡如讐每憤激正坐時命遭其屯人生除貧貧則已
五鬼到此安能神天以清名補寒餓昔之隱者人皆聞
聖賢法則吾豈敢鄉里小兒安足云况君能醫當濟世
未歎行路常踈踈伸眉一笑索我別北風吹雪來繽紛
溪畔無錢附歸去垂橐不管妻子嗔青山白石大自在
且復挂子頭上巾江湖多蘆識者少歲晚遠游須待春
君不見舍中之長眼皆肉豈解善事長桑君

題秦東山藏主十八開士圖

環瀛茫茫去不窮大鯨吹浪鼓颶風樓船如山不敢過
況在泛葦浮萑中西方十八大尊者徑渡萬里猶乘空
犀行水開蛟蜃露直下踏入天吳宮龜魚背高孟錫穩
中流正與靈槎同怪頭達拏四罔象一單舁出龐眉公
鼻端噓氣作飛塔舌上彈呪招降龍兩僧促膝披貝葉
一衲裹足須山童雪毛白鹿岐角健斑尾黑虎雙睛紅
最後坐禪如古佛從渠搏控何神通吾聞浮屠多善幻
作詩自賞畫者工君不見海波橫潰鬼神惡我無其術

安能東

重賦明山歌送胥式有儀還武昌

山式從其師
曾堅子白讀

書處

盱母城南隱居者一生耕鑿盱南野何年移入明山來
築樓山顛雲在下環山小塢三十六中有清池蔭桑竹
日高塢口烟霧稍稍見行人出深谷池頭古井穿石空
絕底暗與江流通井中鯉魚長尺半人不敢取疑蛟龍
隱居何人曾子白誰其從者胥生式先生喜與山為徒

意不在仙在樓居胥也來讀山中書溪翁野老時時一
相過有筐盛蕨兮有酒盛壺興酣題詩滿青壁墨痕入
石青模糊華蓋浮丘石門麻姑鄰峯丘壑可遊行山中
之樂足以適吾軀生今掉頭不肯住京塵茫茫歲云暮
豈知印亦愛山人未辦山貲得歸去曾先生幾時把袂
明山行洒掃樓上聽松聲黃精飽啖一千日飛上丹梯
朝玉京

息齋竹石古木為會稽韓李博士題

上有歐陽
原功承旨

題

老竹葉稀多禿枝新竹碧潤含幽姿籜中龍子振春蟄
爰出雷雨頭參差旁蹲怪石石罅裂裂處恍惚疑龍穴
山中有樹皆十圍活榦撐青死槎折霜皮食盡乾蘚文
半頂斬立雙桮分最後一枝身出羣垂枝倒走陰崖雲
李侯標致不可得小字親題別塗黑縱橫不在摩詰下
蕭爽直與洋州敵玉堂學士欣見之濃墨大書真崛奇
森然一片鐵石筆妙甚七字瓊瑰詞此詩此畫今兩絕

把翫微風動毛髮只應真宰泣凋鏤一夜山窓冷秋月

崑山寺

在吉安

崑山窅兀摩空蒼寺幽更枕山之陽松杉高出人境外
樓閣半在天中央日照檐楹分杳靄風回廊廡添清涼
谷聲遠合蒲牢韻林近時聞薝蔔香紅塵咫尺到不得
黃金地面生輝光我疑意在融結際真宰用意非尋常
雲埋烟蔽歲月古未與時會猶潛藏一旦寶像頓發見
果聞玉磬鳴高岡二生開示此經始源流既濬深必長

乃知景物不自勝惟人方可存其綱

休洗紅二首

休洗紅洗紅紅在水新紅換作裳舊紅翻作裏回黃倒
綠無定期世情翻覆君所知

休洗紅洗紅紅減色雖好不如新著時須愛惜阿母嫁
女不擇人雞飛狗走長苦辛

悲寒風

夜漫漫風凜凜嚴霜下寒更甚狐鳴鬼嘯有今夕倉卒

劍戟生高枕神光墮地摧
白虹鳴咽英雄淚空飲

蛻菴集卷一

欽定四庫全書

蛺菴集卷二

元 張翥 撰

五言律詩

登歌風臺

君王逝已久遺構在彭城
空濶青徐圻蒼茫楚漢爭
荒山尚雲氣喬木有風聲
無限登臨意長歌慷慨生

黃河

櫓後風才順桅頭日未斜
舊河通瓠子新浪漲桃花得

鱸因沽酒聞鵲更憶家迢迢雲氣外北望是京華

泊淮口

灩灩潮初上移舟出浦中岸分清濁水帆掉合離風
楚方言雜徐揚地利通何殊入喬口懷古思無窮

蚤發魯橋

路滑雨初歇山昏雲不開看鐙野店近聞鐸買車來馬
飽力方健蚤寒聲易哀偶逢南去使早早附書回

泊隆興章江門

把酒西風裏挂帆南斗傍夕陽城角盡人影水中長問
俗勞羈旅干時儼俊良平生槎上意漂轉益難忘

次曹娥江

廟貌丹青古碑詞風雨訛玦投估客拜神降女巫歌沙
竈燒鹽速潮船聚堰多貞魂招不得揮泪大江波

還自臨江省親鄞之長山元日有作

丙辰

茆屋鹿皮几柴扉烏角巾杯盤豐海味禮數略鄉人樹
霽石湫曉山暄槎浦春僻居無一事即是葛天民

衡山福嚴寺二十三題為梓上人賦

般若寺

般若南朝寺思公第一傳拓開方丈地坐斷再生禪
貝葉收經夾曇花散法筵山神應夜夜來禮佛燈前

一生巖

初地靈峯下重來為講經神應合掌受石亦點頭聽雲
鶴隨飛蓋湖龍入淨瓶至今花雨處長照一鐙青

二生塔

塔寺前朝舊山林宿業空法身無幻壞藏骨自神通寶
供珊瑚碧珠花舍利紅無緣香一瓣回首佛堂中

三生藏

神僧涅槃處那有去來今尚記三生石難磨萬古心地
埋禪刹在山掩岳祠深長日聞鐘梵蕭蕭楓桂林

天柱峯

一柱標南紀神功自斷鼇寒過岫巉遠勢敵祝融高異
鳥沅清響神鐙見白毫危顛可觀日夜湧海東濤

擲鉢峯

神僧手中鉢擲向最高峯
徑度虛空上難尋變化蹤
錫飛曾近鶴劍躍或成龍
搔首不可見煙霞千萬重

定心石

燕坐百念息湛然方寸間
相無分彼我空已判真頑
魘魅來相試芻尼去不還
衆人笑癡衲長日此看山

磚鏡亭

曹溪一祖後衡岳世多賢
分得燈相續提將印密傳
法

音風萬籟禪性月中天珍重磨磚喻微機要自詮

隱身崑

塵世苦熱惱山林長夏幽岳神來護法尊者坐經秋呼
粥魚頻響銜花鹿自游法雲長散滿七十二峯頭

三泉

一沼

功德泉

天成後雙泉神應來雲根錫卓破

卓錫泉

地脈

虎跑開

虎跑泉

暗溜懸山雨寒光漾石苔諸僧朝盥罷相

次上堂回

嶽心亭

何許新亭好軒窓窈窕深天開雲四面地據岳中心雨
綠蘿蕪道風香蒼筤林曉嵐收不盡猶作半山陰

目雲亭

兩公俱古佛遺跡在新亭塔寺疑神造山川本地靈峯
秋陽雁斷潭暮雨龍腥老宿忘言久閒拋案上經

迎雲亭

細路捫蘿上高亭在翠微樹陰懔草坐山氣濕田衣落

日孤鐘動遙天一錫飛悠然片雲下知是應真歸

兜率橋

傳是竺僧說幽如兜率宮驅龍劈地險架石補天空星
土熊湘合雲沙鷺嶺通闌干倚來久時度吉祥風

開虹橋

蛭煉橫當道蜿蜒下匯潭幽光飛睽睽危構鬱耿耿鳥
下窺寒瀑樵回帶夕嵐遙知說法處來作老人參

大慧塔

大慧談經地林園即給孤鑿雲藏舍利鞭石起浮圖風
鐸時喧寂天經忽有無沙門每來此三繞作南謨

讀書堂

上年賢宰相遁迹白衣時試問葫蘆卜何如懶瓚知才
名留別傳香火寄空祠千載衡江水東流有所思

煨芋窩

彼美山中芋輪囷類餓鴟暖生松火夜香透竹爐時虎
跡羣行滿猿聲獨嘯悲鄴侯知味否莫比御燒梨

御書閣

粲若唐宸翰森然宋賜書寶藏經閣上光動道場初川
岳留奇觀風雲繞淨居何時能一到銀鑰借開魚

退道陂

神鑿三百級盤迴上峻陂攝衣蒼蘚滑倚杖白雲多野
叟耕康畷山都寄鳥窠朱陵是儔侶飛錫定相過

止南寮

昔隱黃龍老今遺書記寮人天所供養巾蓋此逍遙仙

樂時時下香雲往往飄千秋一金塔

闕

藏雪寮

雪山一片雪何日落中華皎潔無藏處虛空自作花石
厓穿乳竇海岸疊潮沙底用分荆越諸方總是家

冰雪菴

近嶺無冰雪菴居易過寒飯炊麻子熟衣補衲頭完顚
氣詩脾裏雷音講舌端知師最清苦歸去北山干

題桐廬鳳山寺僧道大鷲雪軒

禪客忘機地春鉏爾亦靈飛來萬點雪巢破一林青晚
瀨明拳足秋蘿退閣翎山神護說法吹斷草風腥

蓬軒為吳僧元誼賦

縛竹作禪宇小於江上舟樹聲疑疊浪月影似中流興
寄江湖遠身同世界浮懷師燕坐處吾道在滄洲

靜寄軒為吳僧一元賦

羣動寂寥外一軒瀟洒中山林亦長物身世本虛空清
磬花龕日孤燈竹榻風不曾離寓所惟有主人公

抱素子作自適圖求題

隱者抱幽素獨行穿杳冥有詩吟木客無駕勒山靈寒
澗流沙白秋雲入竹青攜琴向何處彈與野猿聽

北山誦藏經三旬畢詩以調之

金布莊嚴地花飛梵唄時舌端談孔雀頂上集芻尼國
壽祈天永皇心體物慈明當喜圓滿一月廢吟詩

用北山韻答之

吾衰年冉冉師樂日閒閒師以詩娛意吾將酒駐顏看

雲知幻滅見月喜明還莫問誰家曲相酬笑語間

次柱德常僉院韻

鼇禁欣同直高閒勝俗忙露花迎夕歛風樹借秋涼太史蘭臺筆郎官粉署香時時鈴索靜有喜到嘉廊

馮秀才伯學以丹青小景山水求題

沙禽毛羽新來往采桑津野水碧于草桃花紅照人徘徊遠山暮窈窕江南春芳思不可極悠然懷釣綸

送觀性空上人歸省

白髮高堂在青山舊業貧載經隨客舫留偈別禪鄰行
路半春雨近鄉多故人一龕還可老莫汙衲衣塵

送以中及公自揚天寧寺遊匡廬

趺坐對禪鐙江風浪幾層還從鶴城路去訪虎溪僧湖
曉星浮石巖春瀑斷冰吳中却回日應老舊池菱

清軒

軒居最瀟洒不受一塵侵門斷懷金者人知飲水心鶴
聲生晚思竹色淨秋陰此意琴尊外翛然只自深

話舊送胡士恭之京師

話舊共蟬聯河橋且繫船春歸花滿地江濶雨連天處
士題鸚鵡詩人拜杜鵑此生雖老去未敢愧前賢

自顧

自顧推頽客仍居寂寞濱月傭奴許少歲計婦憂貧酒
後詩成夢燈前壁寫神漁樵吾所喜相見即情親

懷天目山處士張一無二首

仙巖道士禮
中峯受戒具

一飯了年華蒲團靜結跏雪蹊拋即栗風壁裂袈裟寒

狢窺燒葉饑禽聽施茶
清除億劫想吾欲問僧伽

其二

僧舍蜂腰綴君居第幾間
池冰寒挂瀑雲雪白藏山
未得拋塵網相從出死關
東岡幻住塔禮罷幾時還

送福上人無際南歸

歲閏春來早師行且過寒
問程山寺遠乞食野人難
空性元無際禪鋒豈有端
遇予方外友一為問平安

清河水漲答復中吉監縣水字韻

潏漾清河漲湍流滋浸淫滄溟渾灌注濁浪浩浮沉洲
渚津涯濶泥沙沮如深泓淮澤鴻滿漂蕩渡江尋

送鄭喧宣伯赴赤那思山大幹耳朶儒學教授

四首

其一

聖祖興王地風雲護大營天垂紫塞濶星戴赤山明人
俗殊淳古皇文易化成君行當勸學無愧魯諸生

其二

絕漠同文軌提封振古稀犬牙開武帳元老秉天威
白馬紫駝酒青貂銀鼠衣那思山水曾覩六龍飛

其三

野散千軍帳雲橫萬里川寒多雨是雪日近海為天
黑黍供甘釀黃羊飽割鮮廣文但少客寧慮坐無羶

其四

晨發戒行裝風沙磧路長油蘄白鼻馬藍綬赤銅章
文

學重新命

闕

宮中舞隊歌詞

十六天魔女分行錦綉圍
千花織步幃百寶貼仙衣
回雪紛難定行雲不肯歸
舞心挑轉急一一欲空飛

其二

鑿海行龍舸憑山起鵠臺
天池神馬出月殿舞鸞來
六合妖氛靜羣生壽域開
吾皇樂民樂願上萬年杯

其三

白玉琤欒燕黃金鑿步蓮
簫吹鳳臺女花獻蕊宮仙
香

霧團銀燭歌雲撲錦筵請將供奉曲同賀太平年

潞莊

松棚叟賣漿棚下午風涼獨澗繞羣木數家成一坊蜂
行花已密蠶罷葉仍桑此地無千步真堪作蛻藏

聞蟬

中庭白榆樹時有一蟬聲沸視方抽緒鳴絃忽斷箏蒼
煙起平楚落日下高城曾是天涯客因之百感生

雁聲

嘹嘹數雁度流響一淒然半落淮南雨遙沉海上天踈砧欲斷處哀角未吹前我亦離羣者聞之夜不眠

馬通薪

可代薪如桂還宜火作煤翁攤扶杖立童拾戴筐回野屋寒堆整山爐夜撥灰廢官無好事不遣換香來

陳伯將作北山梓公嶽居圖余題其上

高僧業何許雲夢澤南洲樓閣諸天上江湖萬里流禪心無住著世事若浮休寂寞京塵裏披圖時卧游

烏桕樹

西湖慈雲山側和靖有詩

巾子峯前樹逋仙句最工
迥明霜寺外半落石池中
鄭老惟書柿萑郎只詠楓
山林正寂寞備此作春紅

書所見

戊戌七月

溝中人啖屍道上母拋兒
有眼何曾見無方能療饑
干戈未解日風雪正寒時
歸向妻孥說母嫌朝食糜

其二

城南官掘穴日見委屍盈
終朝烏鳥下薄暮狼狐鳴
冰

裂人剝骨風悲鬼哭聲茫茫死生理真宰豈無情

偕鄢元止善東門視田

白骨如亂石荒村殊慘神惡風生殺氣斜照逼歸人應
俗悲多故全生幸此身青青原上麥亦復可憐春

題林德清竹雪齋

高齋修竹林積雪竹間深歲暮不改色幽人同此心種
梅分地隙籠鶴就牆陰想見椒江上扁舟許客尋

雪後

雪後北風急起行冰滿鬚凍泥憂蹇馬活火愛團蒲數
口狼依狽羣情虎畏貙每逢來使問親故有書無

其二

路滑堆殘雪山晴散宿霾民生已塗炭兵氣尚江淮撫
世憂徒切謀身計自乖臨觴且復醉吾命有安排

癸巳元日即事

禁苑朝珂集宮樓畫刻傳雲開黃道日春麗紫薇天進
虎蠻如畫儀鸞仗類仙晨觀淨氛氣即是偃兵年

大駕時巡千官導送至大口

萬乘巡行遠三靈佑護多旌旄隨大纛鼓鐸雜鳴駝麗
日浮黃繖微風送玉珂臣心如草色不斷到灤河

松巢為潛川謝堯章作

林棲有隱君結構出塵氛就樹遮青雨牽蘿補白雲雙
鳩從此拙獨鶴與平分華屋非無數山中了不聞

蛺菴歲晏百憂薰心排遣以詩乃作五首

開歲七十五故園猶未歸看從今以後知復是邪非星

斗天垂象龍蛇地發機邊聲近稍息一醉典春衣

其二

小小新齋閣溫溫舊氍毹精神全藉酒筋力半支藤
蟄豸深坯戶冥鴻巧避矰蒙頭衲被底何異在家僧

其三

世路正如棘吾生猶繫匏詩人歌蟋蟀軍士歎蠅蚋
無地營家食何心解客嘲山林徒在眼難覓一枝巢

其四

書舍如僧舍心閒與靜宜
寫多髭兔頰藏久蛀貂皮
官蹟年勞見生涯日歷知
未應同與俊肯負沃洲期

其五

久悟無生法從容與化遷
機忘棹俯仰道悟室中邊
宇縣猶多壘干戈已十年
吾惟待其定歸種故山田

十月一日

瓦盎醅純白磚爐火乍紅
風生月暈後霜下角聲中
饑鼠窺燈暗驚厖吠巷空
于今玉堂老詎信暮途窮

立冬前二日

高秋日淒冷且復閉門居
蟬壯輸芒後醅香出榨初
霜籬存晚菊臘羹作寒菹
更好山翁唱陽春恐不如

吳下客懷秋荅湛困白先生廷玉

湖海無窮事風霜薄暮年
客程淹白日吾道信青天
影自酬形贈心寧愛目憐
平生五字律名在萬人前

懷先隴

京國留家久餘生只自憐
一單如老衲八十又新年
義

士心猶血讒夫舌謾涎何時抱尊酒哭向計峯前

七月廿九日

此醜今方殛京城蹀血新也知天悔禍誰謂國無人勝
氣騰龍虎沈機動鬼神大廷親命詔終夜在延春

自誓

此醜行當殛吾身敢顧危要看奪笏處正是結纓時萬
古千秋在皇天后土知寸心三尺簡肯愧史臣詞

乙巳初度

今日吾生日開尊向竹齋家人更上壽凡事且寬懷學
道精神淡匡時志願乖百年原土上自有一坏埋

病起

強起梳頭坐窓明晚景新生遭兵是劫病與鬼為鄰農
事田疇廢邊聲鼓角頻故山多藥物徒切未歸身

歲晚苦寒偶成四章錄似北山

風暴寒逾急星回歲欲周缺牙便食粥瘦骨怯重裘節
物殊牢落前圖益謬悠蛻窩真類蟄長日火鑪頭

其二

清眠夢屢覺霜氣轉淒淒
春近雁北向月明烏夜啼
爐香留墨篆燭淚聚銀泥
少釋幽憂疾尋君一杖藜

其三

鼠劣翻書冊猫馴伴坐氈
吟懷欣雪夜疾目畏風天
惟酒能消日無方可引年
我詩猶偈子一問北山禪

其四

短景催殘歲窮陰連大荒
狙三隨所賦龜六可深藏
未

了惟文債堪歸祇醉鄉絕食有餘暖翻喜夜天長

雨涼

一雨收殘暑新涼夜頃添秋聲滿落葉蟲語傍虛簷衰
病便高卧游程歎久淹山林雖寂寞亦足養吾恬

四月十三日

白丁驅上城徒手不能兵鬪將無人色行塗多哭聲惟
將孔達解竟遣夙沙烹滿眼黃塵暮悲風慘淡生

城東廢寺

一徑入荒寂松風長夏寒夜又棲敗屋魔女去空壇古
佛金全剝遺碑字半剝時逢好事者來別辭文看

遊劉真君廟

俗曰三十郎文
山嘗避兵於此

古廟西原上虛廊半欲摧水龍鱗剝雨畫鬼面生苔叟
乞燒錢火巫抄構殿材英雄有神護遁跡此中來

漸老

漸老惟貪睡相留大有情詩從年長淡寒入夜深清不
鼓牀琴疲慵書帖字生燈花獨可喜連夕向人明

夜宿青芝墳園

水落寬船步年豐密酒壺土酥分地產木蜜薦秋腴認
路塵蹤斷拖筇野影孤行人不可暮落日有於菟

上都從駕幸東涼亭

鶴禁煙華紫龍岡草色青羽林移曉仗法駕幸涼亭大
業開天道甘泉發地靈微臣叨侍從願覩萬邦寧

西內應制即事

烽火連齊魯干戈接隴秦四郊多壁壘萬里半煙塵將

帥屯兵久君王遣使頻老臣叨視草進罷益沾巾

行次獨石驛大雨驛行廿里喜晴

段段青天出浮雲四散歸燕忙攬馬過蠅亂撲人飛遠
道倦行李故山思采薇北風朝已冷未敢御絺衣

暴疾卧草堂

伏枕朝傭起惟將藥裹親紛紜眼前事憔悴病中身宿
露濃於雨秋花好似春最嫌薑桂絕無處乞諸鄰

有旨翦領宋史刊於江浙次東阿站

南來十五驛幽絕獨斯亭下榻月初上捲簾山更青千
時嗟暮齒從事厭勞形寂寞江雲外誰知有使星

九日抵武安縣徘徊店

水落衡漳急川回上黨高流年秋忽忽行路日滔滔山
市人多瘠沙溝地不毛村墟欣有菊小駐為持醪

代祀涇洲天妃廟次直沽

曉日三叉口連檣集萬艘普天均雨露大海靜波濤入
廟靈風肅焚香瑞氣高使臣三奠畢喜色滿宮袍

次石門驛

投老復行役江湖秋興悲
艤舟黃落處欹枕黑甜時
燕閨歸何晚鷗晴浴故遲
不妨無事飲聊遣有情癡

剡中清風嶺王節婦沈江處有血書石上

盡日經行遠雲山又嵯峨
山江光寒照外雨氣亂峰間
野艇冒魚賣村巫詛虎還
千秋貞婦廟留在

關

關嶺

新昌縣

青林抱澗阿直上更嵯峨
田鑿雲根種人盤鳥道過
亂

泉鳴暗谷豐草被陽坡彷彿疑山鬼衣裳隱薜蘿

雨中次黃巖驛

宿雨晨初歇高秋日浸微水聲千澗落雲氣萬山歸委羽洞天在仙人飈駕飛丹砂如可問吾豈戀朝衣

夜過石溪驛

籃輿搖醉夢軋軋過前岡木落風聲碎行人月影長遠村時見火霑露忽零裳一笑方言異前途殊未央

劉山驛

處州馮山嶺

茲山類台剡回復度中岑傳舍白雲上人家烏柏林此
身嗟老大行路轉嶇嶇佳處時停策終焉愜野心

瀨溪

一名
猴溪

古渡猴溪外風煙淡欲無島人形貌怪閩語言殊小
店魚蝦市深林猿鳥都肩輿看山好候騎緩前驅

發漳州

萬里漳南道遙連嶺嶠東山寒冬息瘴海近晝多風廢
圃攢筋竹疎林落刺桐檳榔新善啖一解宿醒空

歸武林冒雨至練市韓伯清莊

溪雨寒猶重山雲晝不開老夫喜閒暇練水得沿洄鳬
雁衝船過魚鰕入饌來故人居漸近應待舉吾杯

泛舟青鎮至姚師善莊夕回韓莊

明月半溪水歸人中夜舟樹陰屯岸合螢影入烟流
業生無取田園老可謀悠然發清詠思繞白蘋洲

召入國學雨中過高沙湖

細雨洒秋色平湖生白波客心貪路急帆力受風多落

木生詩思驚禽避棹歌舟行不借酒兀坐奈愁何

北歸四月一日舟至市涇

乙丑

綠樹村村合晴川浦浦通岸容寬積雨水色定回風戍
近時鳴柝漁歸忽艤蓬船人喜相約乘早過垂虹

留宿洪洞慶雲觀劉山甫方丈

旅寓丹房夜高城乍絕鐘蠟花燒燭短乳面潑茶濃山
豁三更月秋添四壁蛩殷勤老貞士清話得從容

舟行即事二首

霧樹渾連水水溝不受潮米鹽江上舫魚菜市中橋壯
士寧辭辱仙公會見招邊淮無酒禁磊磈剩須澆

其二

天水渾無際中流明月輪山形立積鐵潮色爛鎔銀沙
露凍粘石海風寒薄人舟師傳吉語沽酒祭江神

歸來二首

擾擾羣生裏茫茫大化中是非同喻馬得失一已弓買
酒從賢濁論文任鬼窮此身河上鳥只合信天公

其二

處士聲華遠吾生志趣同
結廬猶洛北避世即墻東
幾見薰天富俱成撲地空
虞羅謾機事未許篡冥鴻

七月一日之集慶望日次錫山宿玄文館

海月光芒濕川雲意緒閒
剛風浮地外元氣滿人間
野榜歌相答漁燈去不還
電明知有雨只在九龍山

九日謁告歸阻風御河

雨後風何暴藏舟古岸陰
早霜紅樹徧殘月白河沈
鷗

泛乘長浪狐跳沒遠林人生信淹速那敢易初心

至通州

去歲南歸以九月十二日發通州今年召入亦以是月日至通州云

驛卒爭鳴鼓舟人喜下桅依然今日到却似去年回岸
黑秋濤縮川紅夕照開君恩忘險阻不覺畏途來

自悟

古佛風翻盞詩僧醉可朋有生還有劫無盡本無燈蚤
自楞伽悟今非願力能此心寧萬慮於道只三乘

其二

海內虛游子山中脫骨仙一單如老衲八十又新年野
馬飛窓日醯雞舞瓮天吾今丈人行肯與衆爭憐

上除日南山蓮社期懺偕伯清昆季還飲南園
楔飲湖亭上臨流自袂衣閨留春事晚風打酒船稀蛙
子黑初出桃花紅欲飛早霞知有雨露洒送人歸

伯青邀予至青芝塢汎湖暮歸

塢乃韓之
先隴也

落日風花起寒波倏渺然山藏進雪寺岸護種水田醉
眼輕浮世牢愁入暮年若為湖一曲攜釣隱漁船

清明遊包家山

乙丑

遠近紅千樹繁開奪艷霞月明寒食雨春老上陽花輦
路迷游躅宮詞入夢華東風葵麥浪回首野人家

其二

太液曾來鵠高臺舊影娥美人黃土盡故國白雲多野
草荒神籙宮蓮怨棹歌羌兒洗馬處斜日滿寒波

偕楊瑞元誠王杰自行湖隄閒步

湖上西風急秋陰止杳冥水痕連岸白山色徹雲青
鵝

燕依深谷還鷗下近汀君歌我當和有酒滿長筵

秋試後胡益士恭歸番陽與游吳山聖水寺

高處見滄溟西風吹酒醒潮來一片白山擁萬重青草
木如浮動烟塵忽杳冥登臨不可極吟思滿秋汀

清明日偕李欽嗣遊吳公弓臺至雷塘蜀井

路絕平沙過新塘水半乾龍歸雷雨惡鵲沒海天寬縣
幟春醅熟行厨野祭寒此生無倚泊隨處得盤桓

九月八日陪危太樸偕梁九思游城南三學寺

萬壽寺

南城多佛刹結構自遼金
傍舍遺民在殘碑好事尋
雨苔塵壁暗風葉石牀深
一飯蒲團了蕭蕭鐘磬音

其二

休日得連騎高秋天氣新
樓臺惟見寺井里半成塵
壞廟鬼無主荒丘孤化人
千齡共須盡回首一傷神

文昌樓望月時家已歸浙上

今夜溪樓月登臨倍惘然
電光何處雨風色欲秋天
歷

歷燈緣岸依依笛起船江湖歸路渺回首白鷗前

清明日遊東山謁棲霞嶺仇先生墓

前輩凋零盡南陽有古阡詩應傳四海酒不到重泉槐
國真成夢桃源亦是仙松根一朶淚慘淡墮風煙

秋日獨行便上偶至清修寺

庚午

溪南野寺幽巾舄偶相求古道多黃葉殘僧半白頭遠
村高鳥暮灌木亂蟬秋此地茅堪剪吾將卜隱丘

四月望觀帝師發思跋影堂

佛子來西竺巍然南面尊法筵花散漫香殿玉溫磨龍
象諸天下鐘螺竟日喧朝觀立隨喜如在給孤園

九月六日宿寶集寺

來借禪房宿悠然空客心殘僧幾人在古殿一燈深簷
鐸能蕃語齋居發海音重陽又已近聊復此登臨

次韻莫景行秋雨喜晴

苦熱不可忍汗膚鱗甲生雨分何處落月在半天明蟲
語迎秋早川光入夜清得涼忘坐久河漢忽西傾

甲子元日夜大雪初三日立春始晴

幾年無此雪南國見應稀平地深三尺飛花大一圍銀
河乾徹底白石爛生輝潤色饒梅柳新春曉已歸

南園宴集雨歸有作

驟落菰蒲雨遙生菡萏風歸雲龍井黑倒照鳳山紅簾
暮舟頻引衣涼酒屢空歌聲未可放花底有驚鴻

辛未苦雨

禾田猶鉅浸春日復連綿醉使呼堂上饑人死道邊鶴

神方下地龍伯已行天真宰如容問吾心血可箋

癸酉人日雨中

是歲十二日立春

積雨將謀雪新年未入春半生如過客七日又逢人采
勝天花小香醪玉色醇多憂亦何事適意任天真

與勃海孟芾景章守歲成居竹宅

子長一歲

此老無柴棘襟期一見同詩如孟東野名是米南宮把
酒推年長圍爐到夜終賸吟須賸醉相對各衰翁

庚辰元日立春

采燕方迎歲，蒼龍忽建辰。
車書時有道，宇宙物皆春。
紅喜燈花重，青看菜甲新。
屠蕪不辭後，已是白頭人。

戊子正月連雪苦寒，答段助教天祐吉甫二首。
雪寒渾未解，風力更狂吹。
強飯憐君瘦，重裘覺我衰。
酒香紅面頰，燈影黑鬚眉。
黃鶴山中地，求田已有期。

其二

三年冗博士

自謂

四海老詩人

吉甫

同是桑榆日，惟堪

麴米春清羸，元壽相

吉甫

骯髒任長身

自謂

微子誰知

我從來懶更真

四月十四日習儀白塔寺有旨翦升院判

乍換朝衣紫祗憐客鬢華才知無補世官喜不離家海
燕雛方乳戎葵蕊未花歸來北窓卧塵汙滿烏紗

七月六夜對月

星會黃姑夕天回白帝秋明河初左界大火漸西流晚
景逢多故寒心集百憂山林莽寥落何處覓丹丘

乙未元日

稍稍鐘鼓動紛紛車馬朝張燈照白髮把酒送寒宵黃
石終歸漢洪厓反見堯芻言欣見采拭目望新條

歲除日

七十古稀有欣然歲更新換衣癡女喜分粟故人貧軟
飽須官釀奇溫愛絮巾明當候雲物載筆紀王春

暴風

閉戶復閉戶黃塵千丈生不雨草無色衝風人倒行游
子念鄉土腐儒憂甲兵狂吹不肯息終夜為心驚

長至日

士辰

至節得休暇閉關宜燕居孤懷愁易切遠信語多虛壽
酒教兒勸祥雲聽史書親知半湖海無地問何如

大風時送友南城

南國碧雲暮西風芳草多相思故人遠如此別情何清
絕山僧筆蒼茫楚客歌憑將萬里意一問洞庭波

嘯亭為鹽令賈策治安題

亭在西
興江上

老子掀髯處雲間孤草亭不妨舒逸氣直恐動精靈風

水劃秋湧魚龍悲夜聽幾翻流響歇江冷越山青

寄題欽惟心山房三首

在京口
普照寺

普照南徐寺蒼蒼祇樹林
馱經惟白馬布地盡黃金
午梵鐘聲遠寒燈殿影深
由來世界黑誰與一明心

其二

朱方有真子心印悟南宗
奏樂惟天女聽經化海龍
香凝行道席燈照著衣鐘
猶厭依城市開門別種松

其三

名山旦夕仰方外宿心親業白到初地性空無一塵乞
鐘時出寺坐夏不迎人想見惟心叟風涼滿氍毹

輯山村先生詩卷

昔在垂髫日今吟薄暮年牀孤郝氏選詩得謝公傳故
國空戎馬荒山冷墓田祇令後死者忍泪讀遺篇

其二

卷可留天地詩嘗泣鬼神遊仙歸化鶴披髮下騎麟素
望高前輩青衫老此身棲霞石表在終古不成塵

金山橋上聞苑池荷香

內苑

立馬金河上荷香出苑池
石橋秋雨後瑤海夕陽時
深樹棲霞早微波浴象遲
煩襟一笑爽正喜好風吹

次韻題大雷山桃源汪氏桃隱

鄞縣

幽甚南雷路嘗聞故老傳
墟通賣魚磳潮入種蚶田
櫺子渾成樹桃花不計年
山中多佛寺燈火肅芊芊

其二

南北二十里兩山中過雲采芝隨鹿去拾果與猿分酒

熟青田核美香碧澗芹非君播詩句那得世人聞
鑑堂上人招余遊慧山行舟不成往因寄

竟負山遊約長懷第二泉毀茶休著論載酒謾回船會
摘春林雨來尋午竈煙從師坐聯句祇恐廢安禪

大風

徹晝風何急避行陵樹傍驚沙撲面黑野日暎人黃科
斗旱未出粟留寒欲藏窮途淚易下不是阮生狂

七月旦立秋風雨夜寒

練綢不解暖已索絮衾眠老疾日漸退餘生天所憐
行窻紙響蛾撲燭花偏喜見沽頭報江南有到船

默坐

時俸支
降真香

默坐觀浮世何殊起滅雲猿寒夜嗥母鴉急晚追羣應
俗神嗟耗經冬足苦鞭俸香吾獨喜日可炷爐薰

除夕

坐玩羣兒戲閒供一笑歡朱丸那却鬼白酒不禁寒官
索題春帖鄰分饋歲槃歸期知幾日謾檢厯頭看

初三日夜翫月至中秋日得詩

化工金鑄巧又換一鈎新
遠道傷遊子深閨喜拜人
影縣秋半破明邈日西淪
正擬排宵看裁詩莫厭頻

其二

新月過初弦冰輪次第圓
空中真見相清極恍如仙
舊雨蒼苔地新寒白露天
匡牀延佇久不覺屢移前

悼太平公

晨起酒杯酒北風吹淚痕
豈徒歌楚些端欲叫天閭
碧

化長弘血春歸杜宇魂千秋一史筆誰辨逐臣冤

梅隱為蕃禧觀余道士作二首

隱者多幽事鋤雲自種梅幾盤山徑術強半雪莓苔拾
藥泥丹竈浮香入酒杯時時霞上友清曉踏寒來

其二

茆屋西林下逋仙恐是君支筇鶴外見哦句竹邊聞老
樹春常早空山雪不分道人無夢久何處覓梨雲

寄雲門僧若邪溪兼題其松風閣二首

聞道邪溪叟高年出寺遲
眉毫長幾許布衲破多時
挂錫鶴移樹繙經花滿池
相望一江水歲晚赴幽期

其二

閣外老松子蕭蕭虛籟生
定從何處起寧有不平鳴
我耳固師耳風聲是樹聲
他時叩禪寂衲破睡天明

識趣齋為山陰魏仲遠賦

夏蓋湖濱宅幽然水竹開
莊前魚市合山下酒船來
把釣雲移樹尋詩步石苔
相羊總成趣直待醒心回

送泐季潭遊天台并送淵侍者歸天台二首

來從石城寺去訪石橋僧
錫杖空山路禪龕獨夜燈
道知文暢得詩識皎然能
到日西巖下應吟瀑布泐

其二

解夏回天竺尋真問石橋
鄰房留偈徧歸路載經遙
瀑壯秋懸雨江明日上潮
題詩寄相憶何處覓山寮

送蒲空叙本中往往長蘆寺

在嘉禾

杖錫風塵際師行戒畏途
故人懷檣李春水到長蘆
舍

利藏金塔袈裟繫寶珠禪房大自在應念室中蒲

謁儀則堂上方觀聽續撰釋氏通鑑

平生方外朋今識故鄉僧史有春秋筆談空大小乘香
厨朝飯麪古殿晝燃燈歸路煙蕪外斜陽下道陵

北山以雪窓墨蘭竹石求題次韻

幽蘭出楚畹美竹自湘濱共友三生石俱涵太古春山
林空見相冰雪老通神長作禪房供毋令墮世塵

清溪濯足圖

黃塵滿雙足宜賦故山歸解屨就清泚舉頭看翠微林
猿下窺膝石蘚欲霑衣更覓漁竿伴閒來就釣磯

觀潮

海口潮初上江流湧不行大風生氣勢烈日奪光晶鷁
首來何駛鷗夷怒未平吳兒誇壯觀車馬暮填城

送蒙古僧印空巖黃龍寺

受戒于
天目山

高僧明廷秀受業自南宗心訣提為印禪機捷若鋒爐
香來化鶴瓶水蓂降龍弟子經意外應占舊偃松

其二

古刹西江外師居最上方山神出護法天女下焚香久
客霜鬢滿歸舟雲樹長秋期到天目容我借禪牀

溪居山水小景二首

想像溪居好時來放釣船滄洲茅屋路春水白鷗天林
壑無多地煙霞自一川底須論咫尺對此已茫然

其二

何處野人村微茫澗谷分林多太古樹山有四時雲鳥

跡還成道猿啼或作羣秋風苑屋破誰賦隱思君

水墨達摩像班惟志筆

佛法無多子西山雪柱天應尋葱嶺去方解少林禪
屨露雙脚罽衣披半肩虛空本無住須借影中傳

數日北風興懷過海諸友

數日好風色行人應到家秋花香獨耐寒雁字多斜薄
飲無長酒輕行有小車吾心何爾汝聊復度年華

啖筍

今日食指動新苞來上林此兒生似玉饋我重如金晚
火炊鮮滑春雷發蟄深山園未能往少快老饕心

悠然閣為歛鄭處士作

鄭子林居好遙希靖節賢看山秋色裏把酒菊花前
人境殊多事吾廬自一天能知此中意何處不悠然

次柱德常僉院韻

鼇禁欣同直高閒勝俗忙露花迎夕歛風樹借秋涼太
史蘭臺筆郎官粉署香時時鈴索靜有喜到巖廊

聞董孟起副樞乃弟鄂霄院判凶訃哭之二首
天狗忽墮地兵生牙帳中寧為仗劍死不作倒戈攻故
國魂歸黑平原血濺紅驚心激此變誰為責元戎

其二

羣盜猶銅馬將軍真虎牙死當為厲鬼生不負皇家野
色含沈日河聲怒捲沙征東失名將朝野共驚嗟

過黃河

食指朝來動行庖旅次添淮魚初出網野鴨乍供鹽新

米如珠滑香醪過蜜甜真成不負腹聊爾一掀髯

陪東泉學士泛湖

山靄忽空無春暉正滿湖船頭載家樂花裏駐行厨樂
任喧呼動歸從酩酊扶使君留客意更為倒金壺

題汪會語村隱居

聞道荆村僻幽居趣自成桑中豚宰晚芹外燕泥晴苔
石留僧坐山尊遲客傾憑軒久不到望得白雲生

題太史楊公山居圖

湖上山居好
奎題壓翠微
煙霞改舊色
林壑發清暉
松晚看書罷
荷涼坐釣歸
圖中有真趣
須此挂朝衣

伍牧

宋將尹王援常
州戰死於此

苦戰勤王事
精魂泣鬼雄
壞城兵氣黑
遺鏃血花紅
故老談亡國
明時錄死忠
長吟一搔首
落日鳥呼風

九日行湖上

是節最關情
隨山得散行
西風片雨過
落日半湖明
野菊黃堪把
官醅綠可傾
坐來無限思
散入遠鴻聲

莫矣

莫矣年光速淒其世慮多半生
縣磬室萬事缺壺歌禿
木風難響寒雲日易蹉
向來出處意不決欲如何

寄韓伯清

淫雨俄如此能傷稼穡無積陰
霾日月愁色滿江湖老
大心空壯艱難道愈孤
美人秋水外不寄錦襜褕

蛻菴集卷二